

slot laten, wan dat van us eschet worde, unde de ammechtman scholde us unde de use vor schaden bewaren van den, de mid eme dar weren de tyd, dat me van deme slot orleghede; schüde us aver unde den usen hir en boven schade van den, de mid eme dar weren, den scholde us de ammechtman wedder don in minne edder mid rechte, unde he scholde us vrede gud gheven jeghen use plochwerk to deme Haghene, also beschedeliken ift dejenne, mid deme he van useme slote orleghede, gud hedde, dar me dat plochwerk mede vreden moechte, unde worde use slot, de Haghene, den, wan he dar af orleghede unde sin ammechtman dat slot inne hedde, van siner weghene unde in sineme deneste verloren, des God nicht en wille, so scholde he us dat slot ghelden also, also heren Johanne van Saldere, de to Lichtenberghe wonet, unde heren Ludolve van Honhorst, sinen ridderen, van siner weghene, unde hern Hildemere van Rutenberghe unde Johanne van Rottinghe, usen vründen, van user weghene, düchte beschedelik wesen, unde storve der verer welk binnen den twen jaren, des God nicht en wille, so scholde he, ift id der welk, de he sat heft, edder we, ift yd user vründ welk were, de we hir to ghesat hebbet, enen anderen also guden wedder in de stede setten binnen verteynachten na der tyd, dat jenne witaliken doed were; worde he ok schelaftich mid useme voresprokenen heren van Brunswik, sineme vedderen, binnen desser tyd, dat desse bund steyt, so scholle we unde willet mid user holpe unde mid useme slote, deme Haghene, stille sitten unde erer neneme helpen up den anderen. Alle desse voreschrevenen stücke hebbe we gheloved unde loved mid samender hand in truwen deme eddelen vorsten heren Wilhelme hereteghen to Brunswik unde to Lüneborch to donde unde vast unde unvorbroken to holdende ane jenerleye weddersprake unde argelist. Unde bethüghet dat mid usen ingheseghelen, de to desseme breve hanghet.